

mes imagini filii sui, non solum quod ad afflictionum  
& crucis societatem attinet, sed multo magis ventu-  
rae gloriae & hereditatis coelestis ratione, cum co-  
heredes sint & fratres Christi: unde Apostolus illico  
subjicit, Deum hos, quos ita praefinivit, vocasse, ju-  
stificasse, atque glorificasse, sive vocare, ac justificare,  
& ad gloriam perducere decrevisse, quippe cum hi  
gradus sint, quibus imago filii Dei introducitur in  
eos, quos conformes illi esse Deus praefinivit. Deni-  
que cum Joh. I. Filii in carne apparitio describitur, e-  
umque, cum in propria veniret, a suis non receptum  
esse memoratur, v. 12. additur; *Quotquot vero re-  
ceperunt eum, dedit eis potestatem filios Dei fieri, i. e.  
adoptari in filios Dei, credentibus in nomen ejus, qui  
non ex sanguinibus, neque ex voluntate carnis, sed ex  
Deo geniti sunt:* ut vel hinc, quam memoratu digna  
inter beneficia Dei erga nos homines adoptio sit,  
quamque jucundum de ea meditari, evidenter pareat.

### §. III.

**A**ntiquo jure civium Romanorum adoptionem in  
usu fuisse, notissimum est; docetque Antonius Au-  
gustinus libro de Legibus, qui Tomo II. Thesauri  
Antiquit. Rom. à Johanne Georgio Grævio insertus  
est, pag. 1207. *Veteres praeter duo illa adoptionis ge-  
nera, quae in vulgus nota sunt: cum quis apud popu-*

A 2

lum